



Selasa, 06 September 2022

Ogen: Daniel 1:8-16



Patuh Man Tuhan



Daniel ras teman-temanna si telu tading bas istana raja. Kerian ia arus ngelakoken aturen si lit, salah sadana e man pangan si isikapken bas istana. Daniel meteh maka pangan e la sentudu ras pengajaren agamana (pangan e la badia rikutken pengajaren bas erkiniteken man Dibata) itetapkena me bas ukurna guna la encedai kegeluhenna rikut ras kinitekenna arah pangan e. Ketetapan ukur meteh pengajaren e alu tangkas erbahanca Daniel la tergoda bas kerina tawaren si entabeh bas istana e. Ideherina Aspenas pengulu si itugasken guna ngaturken perpanganen e, e maka iturikenna ukurna. Njujuri Dibata, erbahanca melias dengen mesayang kal Aspenas man Daniel ras teman-temanna. Ibahan pe sada kesepakaten maka aminna pe Daniel ras teman-temanna la man pangan siniaturken bas istana, tapi arus maka Daniel ras teman-temanna pentaren ras jilen asangken kalak si man pangan siniaturken istana. Ibahan uji coba sepuluh wari guna si e, janah teridah maka kiniteken ras tekad si lit erbahanca teridah ulin rupana dengen mbestangen dagingna asangken kerina kalak si man pangan raja. Daniel pe ndalani wari-warina alu tetap patuh man Dibata i tengah-tengah kalak si la nandai Dibata. Kenca telu tahun, ibereken Dibata pemeteh dengen kebeluhen ngertiken pengenehen ras nipi.

Arah turi-turin Daniel ras teman-temanna enda banci tole sirenungken maka kalak si patuh man Dibata la pernah itadingken Dibata. Lit lalap dalam si ituduhi Dibata. La tulpak, la kemalun janah lebih asa si e ibereken Dibata tole pemeteh ras kebeluhen kerna erbage-bage si la pernah terukuri. Nggit mpertahanken kiniteken i tengah-tengah tawaren kenyamanan ras kenikmaten doni enda meherga kal iadep-adepen Dibata. Mari moria, tetap gelem kinitekennta i tengah buena tawaren si mekatap banci erbahanca bene kinitekenta.